

DS. OKKE JAGER, *Op de Man af*, Uitgeversmij. Kok, Kampen, 1957, 83 bls.

Die geskifte van ds. Okke Jager is nie onbekend in ons land nie. Ons het hom daaruit leer ken as iemand met 'n styl van sy eie en wat ook die dinge op sy eie manier sê. Soms kyk die leser 'n bietjie vreemd op, want dit lyk asof ds. Jager 'n effens ondeunde voorliefde het om opsetlik af te wyk van die tradisionele en enigszins deftige segswyses waaraan ons in stigtelike lektuur gewoon is. Maar hierdie verrassende element, afgesien nou van die inhoud self, boei juis die leser en hou sy belangstelling gaande. Die boekie wat hier aangekondig word, bestaan uit twee dele en bevat kort toesprake wat ds. Jager in Oktober 1957 onmiddellik na die nuusberigte voor die N.C.R.V.-mikrofoon gehou het; in die tweede gedeelte gee hy ons 'n aantal toesprake wat hy gehou het op samekomste van die Interkerkelyke Jeugd-Evangelisasie in Rotterdam en wat deur de I.K.O.R. in 1954, 1955 en 1957 uitgesaai is. Die titel van die bundel kenmerk die inhoud. Ds. Jager rig hom regstreeks tot sy inluisteraars (lesers) en spreek hulle as van aangesig tot aangesig persoonlik toe, vandaar veral in die tweede gedeelte die dikwels amikale toon, wat intussen eger nie steurend is nie. Die inhoud van beide gedeeltes is fris en prikkel die belangstelling dwarsdeur. Hier en daar, soos reeds opgemerk, kyk die leser 'n bietjie verras op, omdat ds. Jager dinge so anders sê as wat hy gewoon is om te hoor en die indruk word ook weleens gewek dat daar op 'n enigszins te familiere wyse oor heilighede gepraat word, maar wanneer die doel wat ds. Jager met sy toesprake beoog en probeer bereik, in aanmerking geneem word, kan 'n mens verstaan waarom hy hom sò en nie anders nie uitdruk. Trouens dwarsdeur blyk sy hoë erns. Hy wil die moderne mens in die hart raak en daarom is sy pyle soms sonderling gepunt. Intussen is dit goed dat daar—om nou 'n ander beeld te gebruik—'n verfrissende bries deur ons geekte godsdienstige terminologie waai—mits die koring maar nie met die kaf wegstuiwe nie! Ons wil dan ook baie graag hierdie boekie, netjies uitgegee met 'n helder druk wat die uitgewer tot eer strek, aanbeveel en die hoop uitspreek dat dit 'n ruime

debiet mag geniet. Vir die jong Afrikaanse leser wat nie al te vertrouwd met die Nederlandse idioom is nie, kan weliswaar sommige uitdrukkinge ietwat duister wees, maar die verband verklaar die betekenis. Ons bly ds. Jager dankbaar vir hierdie publikasie.

D. F. ERASMUS, SNR.